

AKASHVANI (AIR)
RNU : KOLKATA
Bengali Text Bulletin

Date: 22.06.2024

Time: 7.50 P.M.

বিশেষ বিশেষ খবর –

- ১) গ্রামোন্নয়নের কাজে স্বচ্ছতা আনতে রাজ্য সরকার সমীক্ষার কাজ শুরু করতে চলেছে।
- ২) জাতীয় পরীক্ষা নিয়মক সংস্থা এনটিএ-র মাধ্যমে স্বচ্ছ পরীক্ষা ব্যবস্থা পরিচালনার উদ্দেশ্যে কেন্দ্রীয় শিক্ষা মন্ত্রক একটি উচ্চ পর্যায়ের কমিটি তৈরি করেছে। দুমাসের মধ্যে রিপোর্ট জমা দিতে হবে।
- ৩) পড়ুয়াদের সুরক্ষায় এখন থেকে প্রতি স্কুলে একজন করে ট্রান্সপোর্ট ম্যানেজার রাখতে হবে বলে রাজ্য পরিবহণ দপ্তর নির্দেশ দিয়েছে।
- ৪) ওয়েনাড় লোকসভা কেন্দ্রের উপনির্বাচনে কংগ্রেস প্রার্থী প্রিয়াঙ্কা গান্ধীর সমর্থনে তৃণমূল কংগ্রেস নেত্রী মমতা ব্যানার্জী প্রচারে যাবেন।
- ৫) মুর্শিদাবাদের সুতিতে তৃণমূল কংগ্রেসের বিবদমান দুই গোষ্ঠীর মধ্যে সংঘর্ষে উত্তেজনা ছড়িয়েছে।
- ৬) আগামী মঙ্গলবার পর্যন্ত উত্তরবঙ্গে অতি ভারি বৃষ্টির কমলা সতর্কতা জারি করা হয়েছে।

রাজ্যে গ্রামন্নয়নের কাজে স্বচ্ছতা আনতে রাজ্য সরকার সমীক্ষার কাজ শুরু করেছে। সরকারি প্রকল্পগুলির সুযোগ গ্রামের মানুষ ঠিকমত পাচ্ছেন কিনা তা খতিয়ে দেখা হবে সমীক্ষায়। সরকারের তরফে দেওয়া অর্থ সঠিক খাতে ব্যবহার করা হচ্ছে কিনা, সেই হিসেবও এবার নেওয়া হবে বলে খবর। বেশ কিছু জেলা পরিষদ ও পঞ্চায়েত সমিতি তাদের কাজের হিসেব সময় মতো দাখিল করছে না বলে অভিযোগ উঠেছে। সেকারণে এবার এই সিদ্ধান্ত বলে রাজ্যের পঞ্চায়েত ও গ্রামোন্নয়ন দফতর সূত্রে জানা গিয়েছে। সঠিক সময়ের হিসেব না দেওয়ার কারণে এবার ওই সমস্ত স্থানীয় প্রশাসনের কাছে জানতে চাওয়া হবে।

উল্লেখ্য, গত কয়েক বছর ধরে সরল-IMFS-এর মাধ্যমে আয়-ব্যয়ের হিসেব জমা দেওয়ার বিষয়টি বাধ্যতামূলক করেছে রাজ্য সরকার। আগামী ২৫শে জুন পঞ্চায়েত দফতরের একটি কর্মশালা রয়েছে। কর্মশালায় এই সমস্ত জেলা পরিষদ এবং পঞ্চায়েত সমিতির দায়িত্বে থাকা আধিকারিকদের হাজিরাও বাধ্যতামূলক করা হয়েছে।

জাতীয় পরীক্ষা নিয়ামক সংস্থা এনটিএ-র মাধ্যমে স্বচ্ছ পরীক্ষা ব্যবস্থা পরিচালনার উদ্দেশ্যে এক উচ্চ পর্যায়ের কমিটি গঠন করেছে কেন্দ্রীয় শিক্ষামন্ত্রক। পরীক্ষা ব্যবস্থায় সংস্কার, তথ্য নিরাপত্তা সংক্রান্ত বিষয়গুলির উন্নতি ও এনটিএ-র গঠন এবং কার্যপদ্ধতি খতিয়ে দেখবে এই কমিটি। ইসরোর প্রাক্তন চেয়ারম্যান ও আইআইটি কানপুরের বোর্ড অফ গভর্নরের প্রধান, ডক্টর কে রাধাকৃষ্ণনের সভাপতিত্বে সাতজনের এই কমিটি আগামী দুমাসের মধ্যে তার রিপোর্ট জমা দেবে।

উল্লেখ্য, দুর্নীতির অভিযোগে ওঠায় পিছিয়ে দেওয়া হয়েছে ইউজিসি ও সিএসআইআর নেট। দুর্নীতির অভিযোগ উঠেছে নিট ইউজি পরীক্ষাতেও।

নেট ও নিট পরীক্ষায় দুর্নীতির প্রতিবাদে ও কেন্দ্রীয় শিক্ষামন্ত্রীর পদত্যাগের দাবিতে মুর্শিদাবাদ জেলা তৃণমূল ছাত্র পরিষদ বিভিন্ন কলেজে বিক্ষোভ মিছিল করে। দুর্নীতির পূর্ণাঙ্গ তদন্তের দাবিতে বিক্ষোভকারীরা অভিযুক্তদের গ্রেপ্তারের জাবি জানান।

পড়ুয়াদের সুরক্ষায় এখন থেকে প্রতি স্কুলে একজন করে Transport Manager রাখার নির্দেশ দিয়েছে রাজ্য পরিবহন দপ্তর। তাদের দায়িত্ব হবে ছাত্র/ছাত্রীদের সুরক্ষিতভাবে স্কুলে আসা যাওয়ার বিষয়টির ওপর নজর রাখা। স্কুলের পরিবহন সংক্রান্ত দায়িত্ব তার উপর ন্যস্ত করা হবে বলে রাজ্য পরিবহন দপ্তর এক নির্দেশিকা জারি করেছে। এ ব্যাপারে পরিবহন মন্ত্রী স্নেহাশিস চক্রবর্তী জানান, পুলিশ, পরিবহন, শিক্ষা দপ্তর এবং অভিভাবকদের সঙ্গে বৈঠক করে এই নির্দেশিকা তৈরি করা হয়েছে। প্রত্যেক স্কুল ও স্কুল বাসকে এই নির্দেশিকা মেনে চলতে হবে। অন্যথায় আইনানুগ ব্যবস্থা নেওয়া হবে বলে নাম মন্ত্রী জানান। এর পাশাপাশি গাড়ির মালিকদেরও বৈধ কাগজপত্র, ফিটনেশ মাটিফিকেট, Location Tracking device ব্যবস্থা বাধ্যতামূলক করা হচ্ছে। সেই কাষ্ট গাড়িগুলিতে মূলক্ষিত দরজা, জানালা, First Aid Box, সি বেল্ট রাখার উপর গুরুত্ব দেওয়া হয়েছে।

রাজ্য সরকারি কর্মী ও আধিকারিকদের ভ্রমণ ভাতায় এলটিসিতে গাড়ি ভাড়া বাবদ টাকা পাওয়া নিয়ে নির্দিষ্ট নিয়ম তৈরি হল। রাজ্যের অর্থ দফতর এই মর্মে বিজ্ঞপ্তি জারি করেছে। গাড়ি ভাড়া বাবদ প্রতি কিলোমিটারে সর্বোচ্চ ১৬ টাকা দেওয়া হবে বলে ওই বিজ্ঞপ্তিতে জানানো হয়েছে। এই সংক্রান্ত বিষয় অনুমোদনের জন্য অর্থ দফতরের কাছে না পাঠিয়ে দফতর গুলিকে নিজেদেরই সিদ্ধান্ত নিতে নির্দেশ দেওয়া হয়েছে। জানা গেছে, রাজ্যে সরকারি কর্মীরা এলটিসি'তে কয়েক বছর অন্তর সপরিবারে বেড়াতে যাওয়ার জন্য ট্রেন বা বিমানের টিকিটের দাম পান। কিন্তু গাড়ি ভাড়া করলে কত টাকা পাওয়া যাবে তা নিয়ে নির্দিষ্ট কোনও নিয়ম ছিল না। ফলে গাড়ি ভাড়ার বিল পেশ করলেও তা অনেক সময় দেওয়া হতো না। আবার কোনও কোনও সময় গাড়ির অত্যধিক ভাড়ার বিল পাশ হয়ে যেত এমন অভিযোগও উঠেছে। এই সংক্রান্ত সমস্যা নিরসনেই এবার সুনির্দিষ্ট বিধি জারি করা হলো।

পানীয় জল, নিকাশীর মত বিভিন্ন পুর পরিষেবা নিয়ে মুখ্যমন্ত্রী মমতা বন্দোপাধ্যায় স্ফোভ প্রকাশ করায় রাজ্যের পুর ও নগর উন্নয়ন দফতর প্রত্যেকটি পুরসভার পরিষেবা প্রদান সংক্রান্ত রিপোর্ট কার্ড প্রস্তুত করেছে। রাজ্যে বর্তমান সরকারের আমলে পানীয় জল সরবরাহ, নিকাশী, রাস্তা নির্মাণ ও মেরামতি আলো লাগানোর জন্য কোন পুরসভা কত টাকা পেয়েছে এবং কত খরচ হয়েছে, তার পুঙ্খানুপুঙ্খ তথ্য ওই রিপোর্টে থাকবে। রাজ্যে পুরো পরিষেবার হাল হকিকত নিয়ে সোমবার বৈঠক ডেকেছেন মুখ্যমন্ত্রী। পুর মন্ত্রী ফিরহাদ হাকিম, প্রতিটি পুরসভা ও উন্নয়ন পর্ষদের চেয়ারম্যান এবং এক্সিকিউটিভ আধিকারিকদের ওই বৈঠকে উপস্থিত থাকতে বলা হয়েছে। সেখানেই মুখ্যমন্ত্রীর কাছে পুরসভার উন্নয়ন সংক্রান্ত ওই রিপোর্ট পেশ করা হবে বলে জানা গিয়েছে। পুরসভার

উন্নয়নে গত ১৩ বছরে এ রাজ্যের কোষাগার থেকেই ৩২ হাজার কোটিরও বেশি বরাদ্দ করা হয়েছে। এছাড়া বিভিন্ন কেন্দ্রীয় প্রকল্পের বরাদ্দ বাবদ আরো বহু কোটি টাকা পেয়েছে পুরসভাগুলি।

এদিকে সোমবার মুখ্যমন্ত্রীর ডাকা বৈঠকে বিরোধী পরিচালিত পুরসভা গুলির ডাকা না পাওয়ার অভিযোগ কে কেন্দ্র করে বিতর্ক তৈরি হয়েছে। সিপিআইএম পরিচালিত নদীয়ার তাহেরপুর এবং কংগ্রেস পরিচালিত পুরুলিয়ার ঝালদা পুরসভার কর্তাদের ওই বৈঠকে ডাকা হয়নি বলে অভিযোগ। যা নিয়ে সিপিআইএম কংগ্রেসের পাশাপাশি বিজেপি ও সরব হয়েছে।

কেরলের ওয়াইনাড় লোকসভা কেন্দ্রের উপনির্বাচনে ইন্ডি জোটের কংগ্রেস প্রার্থী প্রিয়ংকা গান্ধীর সমর্থনে প্রচারে অংশ নিতে তৃণমূল কংগ্রেস প্রধান মুখ্যমন্ত্রী মমতা ব্যানার্জি সেখানে যাওয়ার সিদ্ধান্ত নিয়েছেন। জোটের তরফে এই কথা জানানো হয়েছে। উল্লেখ্য প্রবীন কংগ্রেস নেতা পি চিদাম্বরম চলতি সপ্তাহেই সচিবালয় নবান্নে এসে মুখ্যমন্ত্রীর সঙ্গে সাক্ষাৎ করে বেশ কিছুক্ষণ কথা বলেন। তার পরেই এই সিদ্ধান্ত বলে মনে করা হচ্ছে।

তৃণমূল কংগ্রেসের শৃঙ্খল রক্ষা কমিটি, দুই কাউন্সিলারের বিরুদ্ধে অনভিপ্রেত আচরণের অভিযোগে শোকজ নোটিশ জারি করেছে। দলের রাজ্য সহ সভাপতি জয়প্রকাশ মজুমদার জানিয়েছেন, ১০৪ নম্বর ওয়ার্ডের কাউন্সিলার তারকেশ্বর চক্রবর্তী এবং ১১০ নম্বর ওয়ার্ডের স্বরাজ মন্ডলের আচরণের জন্য কৈফিয়ত চাওয়া হয়েছে।

উল্লেখ্য, এই দুই কাউন্সিলার একে অপরের বিরুদ্ধে দুর্নীতির ও অসত্ আচরণের অভিযোগ তুলে প্রকাশ্যে সংঘাতে জড়িয়ে পড়েন। তারকেশ্বর বাবুর অনুগামীরা স্বরাজ মন্ডলকে মেরে মাথা ফাটিয়ে দেয় বলে শ্রী মন্ডল অভিযোগ করেছেন। যদিও শ্রী চক্রবর্তী অভিযোগ অস্বীকার করেছেন।

দক্ষিণ ২৪ পরগণার রাজপুর-সোনারপুর পুরসভার এক নম্বর ওয়ার্ডের তৃণমূল কংগ্রেস কাউন্সিলারের অফিসে আজ একদল দুষ্কৃতী বাঁশ, লাঠি নিয়ে হামলা চালায়। এতে কাউন্সিলার পিন্টু দেবনাথের তিন অনুগামী জখম হয়েছেন। রক্তাক্ত অবস্থায় তাদের উদ্ধার করা হয়। নরেন্দ্রপুর থানার পুলিশ ঘটনাস্থলে যায়। তবে কি কারণে এই হামলা তা এখনও পরিষ্কার নয়। আমাদের জেলা সংবাদদাতা জানাচ্ছেন, কাউন্সিলার শ্রী দেবনাথের অভিযোগ, তারই একসময়ের সঙ্গী ঐ দুষ্কৃতীরা অসামাজিক কাজকর্মে যুক্ত। ঐ কাজে বারণ করার জন্যই তাঁর দপ্তরে এই হামলা হতে পারে বলে শ্রী দেবনাথ জানিয়েছেন। ঘটনার জেরে এলাকায় উত্তেজনা দেখা দিয়েছে।

মুর্শিদাবাদের সুতিতে তৃণমূল কংগ্রেসের দুই বিবদমান গোষ্ঠীর মধ্যে বোমাবাজি ও গুলি চালানোর ঘটনায় আজ সকাল থেকে উত্তেজনা ছড়ায়। স্থানীয় মহলদার পাড়ার হারুল ও সৌরভ মহলদার এর দুই গোষ্ঠীর মধ্যে প্রথমে বচসা তারপর বোমাবাজি ও গুলি চালানোর ঘটনা ঘটে বলে আমাদের জেলা সংবাদদাতা জানিয়েছেন। বিশাল পুলিশ বাহিনী গ্রামে গিয়ে পরিস্থিতি নিয়ন্ত্রণে আনে। এখনও পর্যন্ত কেউ গ্রেপ্তার হয়নি।

এদিকে রঘুনাথগঞ্জের নবকান্তপুরে জমি বিবাদকে কেন্দ্র করে দুই পক্ষের মধ্যে সংঘর্ষে আজ দুপুরে ব্যাপক উত্তেজনা ছড়ায়। গণ্ডগোল থামাতে গিয়ে ইটের ঘায়ে কিশোর ঘোষ নামের রাজ্য পুলিশের এক এ.এস.আই আহত হয়েছেন। ভাংচুর করা হয় পুলিশের গাড়িতেও। জখম ওই পুলিশ আধিকারিককে উদ্ধার করে হাসপাতালে ভর্তি করা হয়েছে। খবর পেয়ে ঘটনাস্থলে পৌঁছায় জঙ্গিপূরের এসডিপিও ও রঘুনাথগঞ্জ থানার বিশাল পুলিশ বাহিনী। এলাকায় অভিযান চালিয়ে ১৮জন কে গ্রেপ্তার ও বেশ কয়েকটি বাইক আটক করে পুলিশ।

সারা ভারত ফরোয়ার্ড ব্লকের ৮৬ তম প্রতিষ্ঠা দিবস আজ দলের রাজ্য দপ্তরে পূর্ণ মর্যাদার সঙ্গে পালন করা হয়। পতাকা উত্তোলন ও নেতাজির মূর্তিতে মাল্য দানের পর " সুভাষচন্দ্রের জাতীয়তাবাদ ও ফরোয়ার্ড ব্লক" শীর্ষক আলোচনায় বক্তব্য রাখেন নেতাজি গবেষক সৌম্যব্রত দাশগুপ্ত ও সৈকত নিয়োগী। সভাপতিত্ব করেন দলের বাংলা কমিটির সাধারণ সম্পাদক নরেন চট্টোপাধ্যায়।

সীমান্ত নিরাপত্তা বাহিনী বিএসএফের আইজি এবং বর্ডার গার্ড বাংলাদেশ বা বিজিবির রিজিওন কমান্ডারদের মধ্যে সীমান্ত সমন্বয় সম্মেলন আজ নিউটাউনে শুরু হয়েছে, চলবে ২৫তারিখ পর্যন্ত। ভারত ও বাংলাদেশ সীমান্তে অপরাধমূলক কাজকর্ম কিভাবে বন্ধ করা যায় তা নিয়ে আলোচনা হচ্ছে বলে বিএসএফের নর্থ বেঙ্গল ফ্রন্টিয়ারের আইজি সূর্যকান্ত মিশ্র জানিয়েছেন। দুই দেশের সীমান্ত রক্ষী বাহিনীর মধ্যে সুসম্পর্ক বজায় রাখার বিষয়েও বৈঠকে আলোচনা হচ্ছে। সীমান্তে তারকাটার বেড়া

দেওয়া এবং ফ্লাডলাইট বসানো সহ বিভিন্ন কড়া পদক্ষেপ নেওয়ার ফলে অপরাধমূলক কাজ বর্তমানে অনেকটাই কমেছে বলেও আইজি জানান। মাদাক পাচার পুরোপুরি বন্ধ করার জন্য প্রয়োজনীয় ব্যবস্থা গ্রহণের কোথাও জানান তিনি।

হলং বনবাংলো অগ্নিকাণ্ডের ঘটনায় বন প্রতিমন্ত্রী বীরবাহা হাঁসদা আজ আলিপুরদুয়ার পৌঁছেছেন। বাগডোগরা বিমানবন্দরে নেমে তিনি আলিপুরদুয়ারে যান। বিমানবন্দরে সাংবাদিকদের বীরবাহা বলেন, হলং এর ঘটনায় টিম তৈরি করে তদন্ত হচ্ছে। বনবাংলো রক্ষণাবেক্ষণ সংক্রান্ত বিষয়ে গতকাল একটি বৈঠক হয়েছে বলে জানান তিনি। সংশ্লিষ্ট দফতরের আধিকারিকদের সঙ্গে বন প্রতিমন্ত্রী বৈঠকে বসবেন বলেও খবর।

বাইট

কলকাতার হেয়ার স্ট্রিট থানা এলাকার ৫নম্বর গার্ডিন প্লেসের চারতলা বাড়িতে আজ আগুন লাগে। দমকলের ৫টি গাড়ি এখনো ঘটনাস্থলে রয়েছে।

দমকল মন্ত্রী সুজিত বসু ঘটনাস্থলে যান। তিনি বলেন, পুরানো এই বাড়িতে আগুন লাগার কারণ খতিয়ে দেখা হচ্ছে।

এদিকে ঐ বাড়িতেই তাদের কার্যালয় থাকায়, আইনজীবীরা দমকল মন্ত্রীর সামনেই বিক্ষোভ দেখান। তাঁদের অভিযোগ, এই অগ্নিকাণ্ডে কাগজপত্র, কম্পিউটার পুড়ে গেছে। এখানে কোনো অগ্নি নির্বাপনের ব্যবস্থা ছিল না বলেও অভিযোগ।

উল্লেখ্য, আজ ভোর রাতে ওই বাড়ির ওপরের তলায় আগুন লাগে।

একশ' বছর পুরোনো এই বাড়িটিতে ২৫ টি পরিবারের বাস। তবে, বাসিন্দাদের নিরাপদে বাইরে বের করে আনা সম্ভব হয়েছে।

হাওড়া ব্রীজে ফুটপাথের রেলিং টপকে আজ এক যুবক গঙ্গায় ঝাঁপ দেওয়ার চেষ্টা করলে কর্তব্যরত কলকাতা পুলিশ কর্মীরা তাকে আটকে দেয়। দড়ি দিয়ে হাত পা বেঁধে দেওয়া হয়। ব্রিজের ছয় নম্বর পিলারের কাছে এই ঘটনায় আজ ব্যপক চাঞ্চল্য ছড়ায়। যুবকটি মানসিক ভারসাম্যহীন বলে প্রাথমিকভাবে মনে করছে পুলিশ। তাকে উদ্ধার করে হাসপাতালে নিয়ে যাওয়া হয়েছে।

দক্ষিণ পশ্চিম মৌসুমী বায়ু দক্ষিণবঙ্গের কিছু অংশ এবং উত্তরবঙ্গের বাকি অংশে আরও কিছুটা অগ্রসর হয়েছে। দক্ষিণবঙ্গের জেলাগুলিতে বিক্ষিপ্ত বৃষ্টির পাশাপাশি মঙ্গলবার পর্যন্ত উত্তরবঙ্গে ভারি থেকে অতি ভারি বৃষ্টির কমলা সতর্কতা জারি করা হয়েছে। আলিপুর আবহাওয়া দপ্তরের অধিকর্তা হাবিবুর রহমান বিশ্বাস জানানেন,

বাইট

টানা বৃষ্টিতে উত্তরবঙ্গের জেলাগুলিতে স্বাভাবিক জনজীবন ব্যহত। জল বাড়ছে নদীগুলিতে।

কলকাতায় আজ সকালে সর্বনিম্ন তাপমাত্রা রেকর্ড করা হয়েছে ২৭ দশমিক ৮ ডিগ্রি সেলসিয়াস, স্বাভাবিকের তুলনায় যা ১ ডিগ্রি বেশী।

প্রখ্যাত হৃদরোগ বিশেষজ্ঞ ডঃ কান্তি ভূষণ বস্তু প্রয়াত। গতরাতে কলকাতার একটি বেসরকারি চিকিতসাকেন্দ্রে তিনি শেষ নিঃশ্বাস ত্যাগ করেন। বয়স হয়েছিল ৯৬ বছর। বহু সমাজ সেবামূলক প্রতিষ্ঠানের সঙ্গেও তিনি যুক্ত ছিলেন। আমৃত্যু তিনি কলকাতা এমপাওয়ারমেন্ট ফাউন্ডেশনের সভাপতি ছিলেন। কলকাতায় হৃদরোগের চিকিৎসার আধুনিকিকরনে তার অগ্রণী ভূমিকা ছিল। বিশ্ববরেণ্য চলচ্চিত্র পরিচালক সত্যজিত রায় এবং প্রখ্যাত সংগীতশিল্পী হেমন্ত মুখোপাধ্যায়ের ব্যক্তিগত চিকিৎসক ছিলেন ডঃ কান্তি ভূষণ বস্তু।
